

Alto Comisario di Polis cu ultimo desaroyonan relaciona cu e buskeda di Dialuna

ORANJESTAD (AAN):- Relaciona cu e buskeda di e hoben Natalee Holloway cu por cierto a drenta su di 9 dia desde su desaparicion, Cuerpo Policial di Aruba hunto cu Cuerpo di Marina Hulandes, integrantenan di Arumil, miembronan di Search & Rescue, Cruz Cora, EMS, Servicio di Ambulance, Park Rangers, voluntarionan di ambtenarij y un cantidad incontable di voluntarionan den nos comunidad, a tene un accion di buskeda nacional.

Esaki a worde organiza y conduci bou di e liderato di Comisario di Polis di Sta. Cruz, señora Trudy Hassell, y a conta cu cooperacion di diferente empresa priva manera The Palm Tours cu a provee diferente bus pa por transporta e participantenan na e area di buskeda.

Tambe diferente otro empresanan cu a provee cuminda y bebida pa e participantenan. Esakinan a reuni riba dialuna 6 di juni 2005 pa mas o menos 2'or di merdia na haltura di Centro Deportivo Betico Croes na Sta. Cruz. Eynan nan a reparti e grupo cu tabata consisti di mas o menos: 450 voluntarionan civil, 80 soldat, tanto di Marina Hulandes y e grupo Arumil; 100 polis; 25 pa 30 miembronan di tanto Cruz Cora, Ambulance Dienst y EMS, entre e mas o menos 10 busnan disponibel y a sali den direccion di parti pariba di e isla. E buskeda a concentra su mes den e area

pariba di San Nicolas, for di Punto Basora te Rincon. E area aki ta consisti di tanto areanan rural como tambe areanan residencial manera Colon, Lago Heights, De Vuyst, Golfweg, Juana Morto, Zwart Mangel, Vader Piet, Guadirikiri, Weg Fontein, Diamantbergweg, etc.

E buskeda, cu a worde bon cubri pa tanto prensa local como internacional, a trece hopi reaccion di e pueblo cu inoficialmente tambe a cuminsa busca den tur barrio y tabata reacciona na tipnan cu tabata drenta via media, esaki a mobiliza na un dado momento probablemente miles di persona riba full e isla.

Durante e buskeda diferente artefactonan a ser haya na diferente lugar, bou di cual tambe ta e famoso camisa di uniform di un compania di seguridad local. Te na e momento aki no a ser confirma cu ningun di e articulonan aki ta directamente relaciona cu e desaparicion di Natalee Holloway pero e investigacion ta sigui riba cada detaye.

E diferente tipnan tambe cu a drenta unda hende ta bisa di a wak Natalee tambe ta ser investiga di inmediato pero te awor aki no a ser prueba tampoco cu tabata trata di dje. E buskeda a ser para ora solo a baha mas o menos 7'or anochi sin e resultado desea.